

ՍԵՂԱ ՄԱՆՈՒԿՅԱՆ

ԶԱԶԱՐԻԱ ԱՂԹԱՄԱՐՑՈՒ ԶԵՌԱԳՐԱԿԱՆ ՎԱՍՏԱԿԸ

(Ճշգրտումներ, գրած եւ ծաղկած ձեռագրերի ամփոփ պատկեր)

Վասպուրականի մանրանկարչական դպրոցի նշանավոր գրիչ եւ ծաղկող Զաքարիա Աղթամարցու՝ կորած համարվող 1358 թ. ձեռագրի 2 թերթ (չափերը՝ 238x155, 237x158 մմ) հանգրվանել է Խորվաթիայի մայրաքաղաք Զագրեբի Միմարա թանգարանում: Հայկական մանրանկարչության այդ «գտածոյի» մայր ձեռագիրը պարզել է Մաշտոցի անվան Մատենադարանի գլխավոր ավանդապահ, Մայր ցուցակի եւ ձեռագրագիտության բաժնի ղեկավար Գեորգ Տեր-Վարդանյանը, նյութին առանձին հոդվածով անդրադարձել է նույն Միմարա թանգարանի աշխատակից Սլավեն Պերովիչը¹:

Թերթերից մեկում պահպանվել է ձեռագրի մեջ առկա բոլորգիր մի հիշատարական, որ տեղեկացնում է, թե Ավետարանի հետագա ստացողը ուստա Շեխն է, ով պատվիրել է Ավետարանը նորոգել իր, ծնողների, հոր՝ Դավթի եւ մոր՝ Զավիրայի, կողակցի՝ Սոլթանի եւ որդու՝ Հովհաննեսի հոգիների հիշատակի համար²:

Նշվում է, որ ձեռագիրը նորոգվել է «ի դուռն» Ս. Սիոնի եւ Ս. Հակոբի, սուլթան Մուրադ խանի կառավարման, Էջմիածնի տեր Մելիքսեթ կաթողիկոսի հայրապետության, Ս. Թովմա առաքյալի առաջնորդ տեր Ավետիսի, Ս. Սիոնի եւ Ս. Հակոբի քահանա տեր Մեսրոպ Ըղիեցու ժամանակ, «մեղաւոր անարժան» Օհան կազմողի կողմից, ՌԽԲ.՝ 1593 թ.³:

Սլավեն Պերովիչը նշում է, որ մանրանկարները Զաքարիա Աղթամարցին արել է շուրջ 1357 թ.⁴: Պերովիչը 2008 թ., գալով Հայաստան եւ լինելով Մատենադարանում, ծանոթանում է Զաքարիա Աղթամարցու 1357 թ. Հ^մ 5332 ձեռագրին՝ եզրահանգելով, որ Միմարա թանգարանում պահվում են Աղթամարցու 1358 թ.՝ կորած համարվող ձեռագրի երկու թերթը:

1 Տե՛ս **Slaven Perovic**, Zakarija Ahtamarci: Euzebijjevo pismo I kanonske tablige I armenski molitveni svitak pahpanak ili hmail iz muzeja Mimara, Zagreb, 2008 (հոդվածում անդրադարձ կա նաեւ Միմարա թանգարանում պահվող հայկական հմայիլներին՝ «Աբրահամի զոհաբերության», Գաբրիել հրեշտակապետի, ս. Գեորգի եւ ս. Սարգսի պատկերներով, որոնք հեղինակը թվագրում է ԺԷ.դ կամ ԺԸ. դարերով):

2 Տե՛ս անդ, էջ 6:

3 Տե՛ս անդ, էջ 6, նկ. 1:

4 Տե՛ս անդ, էջ 5:

Հայկական մանրանկարչության պատմության մեջ իր ուրույն հետքը թողած գրիչ է ծաղկող Զաքարիա Աղթամարցու՝ 1358 թ. ձեռագրի մասին տեղեկանում ենք Մեսրոպ վարդապետ Մաքսուդյանի միջոցով մեզ հասած հինգ հիշատակարաններից⁵։ ձեռագրի գրչության 1358 թ. հիշատակարանի մի հատված Մաքսուդյանից առել է Լեւոն Խաչիկյանը⁶, նույնը երկրորդել է նաեւ Սիրարփի Տեր-Ներսիսյանը, ում հաղորդած տվյալներին դեռ կանոդադառնանք։

Մենք չգիտենք, թե ինչպես է ձեռագրի երկու թերթը հայտնվել Խորվաթիայում⁷, սակայն Մաքսուդյանի հաղորդած տվյալները թույլ են տալիս ասելու, որ 1358 թ. Ավետարանը Ագուլիսի Ս. Թովմա առաքյալի վանքում 18 համարի ներքո պահվել է ընդհուպ մինչեւ 1919 թ.⁸, քանզի նույն տարվա դեկտեմբերի 24-25-ին Գողթն գավառի սիրտը համարվող Ագուլիս քաղաքի հայ բնակչությունը ենթարկվել է կոտորածի, իսկ Ս. Թովմա առաքյալի վանքի ձեռագրական հավաքածուն ցաք ու ցրիվ է արվել։ Գուցե թե այս դեպքերից հետո մեր ձեռագիրը մաս-մաս հանգրվանել է աշխարհի տարբեր ծագերում։

Մեսրոպ վ. Մաքսուդյանն իր հոդվածում նշում է, որ 1906-1907 թթ. Ս. Թովմա առաքյալի վանքի վանահայր եղած Ժամանակ հավաքել է վանքի, տեղական եկեղեցիների եւ մասնավոր անձանց մոտ պահվող հայերեն ձեռագրերի հիշատակարանները⁹։ Նրա վկայությամբ՝ վանքի ձեռագրերը համարակալված են եղել, սակայն թվերը ձեռագրերի քանակին չեն համապատասխանել, քանզի իր տեսած ձեռագրերը 58-ն են եղել, մինչդեռ ձեռագրերի վրա եղել են 89 եւ 90 համարներ. նշված քանակից պակասել է 32 ձեռագիր։

Սուրբ Թովմա առաքյալի վանքի ձեռագրերը համարակալվել են Գրիգոր վարդապետ Տեր-Ստեփանյանի վանահայրության շրջանում, նրա եղբորորդի Գեորգ Կոստանյան Տեր-Ստեփանոսյանցի ձեռքով։ Հ¹⁰ 74 ձեռագրի մեջ նույն Գեորգ Կոստանյան Տեր-Ստեփանոսյանցի գրած մի հիշատակարան

5 Մ. վ. Մաքսուտեան, Նկարագրութիւն եւ յիշատակարանք ձեռագրաց Ս. Թովմայ առաքելոց վանոց եւ եկեղեցեացն Վերին Ագուլեաց. Եկեղեցւոյն Տանակերտ գեղջ եւ անձանց մասնավորաց.- «Արարատ», 1911, էջ 562-3 (այսուհետ՝ Մ. վ. Մաքսուտեան, Նկարագրութիւն)։

6 «ԺՂ. դարի հայերեն ձեռագրերի հիշատակարաններ», կազմեց Լ. Ս. Խաչիկյան, Երեւան, 1950, էջ 440։

7 Այդ մասին որեւէ տեղեկություն չի հաղորդում նաեւ Սլավեն Պերովիչը։

8 Տե՛ս Ա. Այվազյան, Ագուլիսի 1919 թ. ողբերգություն-եղեռնը, Երեւան, 2013։ Հատորում ներառված են 1919 թ. դեկտեմբերի 24-25-ին Ագուլիս քաղաքի հայ բնակչությանը կոտորածի ենթարկելու վերաբերյալ 7 ակնատեսների (Ի. Տեր-Անտոնյան, Ն. Ավշարյան, Կ. Սիմոնյան, Շ. Հախնազարյան, անհայտ հեղինակ, Թ. Հայրապետյան, Հ. Հախնազարյան) եւ 8 ժամանակակիցների (Գ. Մարգարյան, Պ. Պետրոսյան, Հ. Անագյան, Գ. Փանյան, Վ. Միքայելյան, Վ. Կզարթմյան, Ե. Մելիք-Մուսյան, Ավո) վկայություն-հուշագրությունները։ Վերջիններս, չորսից բացի (Ի. Տեր-Անտոնյան, Հ. Հախնազարյան, Ն. Ավշարյան, Ավո), հրատարակվել են առաջին անգամ եւ կարեւոր փաստաթղթեր են՝ Ագուլիսի ողբերգությունը, ինչպես եւ Նախ-իջեւանի գավառների 1918-21 թթ. իրադարձությունները հանգամանակից ուսումնասիրելու համար։

9 Տե՛ս Մ. վ. Մաքսուտեան, նշվ. աշխ., 1911, էջ 117։

տեղեկացնում է, որ ձեռագրերի համարակալումն ինքն արել է 1898 թ. ամռանը, այսինքն՝ 1906 թ.՝ մինչև Մաքսուդյանի՝ այնտեղ վանահայր նշանակվելը, ույթ տարվա ընթացքում անհետացել է 32 ձեռագիր¹⁰:

Բացի այդ՝ այս հանգամանքը թույլ է տալիս ենթադրել, որ արդեն 1898 թ. Զաքարիա Աղթամարցու 1358 թ. ձեռագիրը գտնվել է Ս. Թովմա առաքյալի վանքում եւ կրել է 18 համարը¹¹:

Մաքսուդյանի նկարագրության մեջ կա նաեւ Զագրերի Միմարա թանգարանում պահվող հիշատակարանը:

1358 թ. ձեռագրի ծաղկողի մասին տեղեկանում ենք 270բ էջի հիշատակարանից, որտեղ Ավետարանի գրիչ Կարապետ կրոնավորը նշում է, որ ձեռագիրը գրել է «յութհարիրերորդի ելթներորդի»՝ 1358 թ., Թանկխաթունի համար, խնդրում է հիշել նաեւ իր ծնողներին, եղբայրներին եւ Զաքարիա ծաղկողին¹²:

Ինչպես արդեն գիտենք, Զաքարիա Աղթամարցին աշակերտել է իր հորեղբայր Կարապետ գրչին, ով հիշատակարաններում հաճախ հիշատակվում է որպես Կարապետ կրոնավոր, եւ ծաղկել է նրա գրչագրած մի քանի ձեռագրեր, այդ թվում՝ 1358 թ. Ավետարանը:

Հիշատակարաններից պարզ է դառնում, որ ձեռագիրը 1593 թ. հետո վերանորոգվել է նաեւ 1653 թ., Միմոն երեցի կողմից, «բարեմիտ ու աստվածասեր» Հերիքնագի համար¹³, իսկ 1789 թ. «ուստա Ավագը» այս Ավետարանը գնել է անհավատների ձեռքից¹⁴:

1358 թ. ձեռագրի երկու թերթը պատկերագրական եւ ոճային սերտ աղերսներ ունի Զաքարիա Աղթամարցու 1357 թ. (Հ^մ 5332) ձեռագրի հետ, որը նրա ձեռագրացանկում առավել հաջողվածներից է: Միմարայում հանգրվանած հիշատակարանի դարձերեսին ներկայացված է Եվսեբիոս Կեսարացու նամակը Կարպիանոսին: Ճակատագարողում կամարածեւ զարդանախշի տակ Եւսեբիոսն է՝ աջ ձեռքը օրհնող դիրքով, իսկ ձախին՝ բացված գալարակ: Այստեղ Կեսարացին բավականին երիտասարդ է պատկերված՝ սեւ մազերով, հոնքերով եւ մորուքով, ի տարբերություն 1357 թ. ձեռագրի, որտեղ Եւսեբիոսն ալեհեր է, սակայն երկուսն էլ նույնանում են ֆիգուրների դիրքով, շարժումներով եւ լուսապսակներով:

Ճակատագարդի, եզերագոտու, քիվի, սյուների զարդանախշային մշակումը եւս սերտորեն աղերսվում է 1357 թ. ձեռագրին, նույնը վերաբերում է նաեւ գունային մշակմանը, սակայն, ի տարբերություն 1358 թ. ձեռագրի, 1357 թ. Ավետարանը Զաքարիա Աղթամարցու մյուս ձեռագրերի շարքում աչքի է

10 Տե՛ս անդ:

11 Տե՛ս անդ, էջ 118 (ի դեպ, պահպանված ձեռագրերից երկուսը կրել են 60 համարը, հակառակ դեպքում կորած ձեռագրերի թիվը կլիներ 33):

12 Տե՛ս անդ, էջ 563:

13 Տե՛ս անդ, էջ 563:

14 Տե՛ս անդ, էջ 562:

ընկնում կատարման բարձր վարպետությամբ, այստեղ ծաղկողի ձեռքը շատ ավելի վստահ է, պատկերագրական, ոճային եւ թեմատիկ լուծումները՝ համարձակ: Ճակատագրողները լեցուն են արմավենու ոճավորված տերեւներ հիշեցնող բուսական զարդանաշխով: Խոյակները եւ սյունը խոյակին միացնող հատվածները պատկերագրական առանձնահատկություններով աչքի չեն ընկնում:

1358 թ. ձեռագրի մեզ հասած 3ա էջի ճակատագրողի կամարներից 2-ը նույն չափի են, մեկն՝ ավելի փոքր: Կամարներն աչքի են ընկնում առատ կանաչ գունավորմամբ, ինչը բնորոշ է Աղթամարցուն, քանզի նրա գունապնակում գույներից մեկը հաճախ դառնում է տիրապետող:

Ձեռագրի 3բ էջը գրեթե նույնությամբ կրկնում է 1357 թ. ձեռագրի պատկերառը: Ուղղանկյուն ճակատագրողի ներսում առանձնանում է եռանկյունը, որտեղ պատկերված է հովազի հետ մենամարտող բազեն, հովազը շատ ոճավորված է, եւ հստակ չի ուրվագծվում բնորոշ պատկերատիպը: Արծիվը պատկերված է թեւաբաց, կարծես պատրաստվում է թռիչքի:

Մեր աշխատանքն արդեն սկսել էինք, երբ տեղեկացանք, որ Մոն-Սեն Միշելի ձեռագրերի թանգարանում պահվում է 1358 թ. Ավետարանի եւս մեկ թերթ, որի մասին ընդարձակ հոդված ունի Աննա Լեյոյան-Եկմալյանը¹⁵: Ավրանշի հայկական ցուցադրությանը նվիրված պատկերագրքում այդ թերթը ներկայանում է Հ^տ 7-ի ներքո, նկարագրության մեջ նշվում է, որ պատամիկի վրա կա կանոնների աղյուսակը, իսկ դարձերեսին՝ «Ծնունդ» եւ «Ավետում» տերունական տեսարաններն են, այն թվագրվում է ԺԳ. դարի վերջով կամ ԺԴ. դարի սկիզբով՝ համարվելով Արծկեի, Արճեշի կամ Բերկրիի գրչատներից մեկի աշխատանք¹⁶: Համեմատական վերլուծության շնորհիվ, առանձնացնելով պատկերների դետալները, մասնավորապես աչքերը, ձեռքերը, մատները, հագուստը, զարդատարրերը, Աննա Լեյոյանը փաստում է, որ պատամիկը վստահաբար Զաքարիա Աղթամարցու ձեռքի աշխատանքն է. դրա օգտին են վկայում նաեւ Զաքարիա Աղթամարցու 1357 թ. եւ 1368 թ. ձեռագրերի հետ անցկացված գուգահեռները:

Մինչ այս թերթի՝ 1358թ-ի ձեռագրին պատկանելու հարցին անդրադառնալը, խոսենք Զաքարիա Աղթամարցուն վերագրվող՝ Չեստեր Բիթիի հավաքածուի Հ^տ 555 ձեռագրի¹⁷ մասին¹⁸: Այս ձեռագիրը բաղկացած է եր-

15 Տե՛ս **A. Leyloyan-Yekmalyan**, Fragment d'un E'vangile du Vaspurakan: E'tude stylistique et icono-graphique des miniatures et identification de L'artiste, REArm 35, 2013, էջ 241-264 (այսուհետեւ՝ **A. Leyloyan-Yekmalyan**, Fragment):

16 Տե՛ս անդ, էջ 241:

17 Հ. Հակոբյանի իր «Վասպուրականի մանրանկարչությունը» (Երևան, 1976, էջ 74) գրքի Զաքարիա Աղթամարցուն նվիրված գլխում Չեստեր Բիթիի Հ^տ 555 ձեռագրի երեք թերթ, որոնք պարունակում են տերունական նկարներ, վերագրում է Աղթամարցուն:

18 Տե՛ս **S. Der-Nersessian**, The Chester Beatty Library, Dublin, 1958, p. 15 (Ս. Տեր-Ներսիսյանը նշում է, որ ձեռագիրը, հավանաբար, ստեղծվել է Վանա լճի շրջակայքում, ոճական նմանու-

կու մասից. մեկ թերթը, որ ունի կանոնների աղյուսակը եւ Մատթեոսի անվանաթերթը, թվագրվում է ԺԲ. դարով, եւ ըստ հիշատակարանի՝ գրիչը Հակոբն է, իսկ ԺԴ. դարի՝ Զաքարիա Աղթամարցուն վերագրվող թերթերում «Մկրտություն/Ղազարոսի հարություն», «Մուտք Երուսաղեմ/Ոտնվա», «Պայծառակերպություն/Մատնություն», «Խաչելություն/Թաղում» տեսարաններն են, ինչպես նաեւ Մարկոսի պատկերը եւ անվանաթերթը, իսկ նոր մասի հիշատակարանում Սիրարփի Տեր-Ներսիսյանը տալիս է հիշատակարանի շատ կարեւոր մի մանրամասն. ձեռագիրը գրվել է Թանկիսթունի եւ նրա ամուսին Հովհաննեսի համար¹⁹: Հ^մ 555-ում պակասում են Եւսեբիոսի նամակը, կանոնների աղյուսակները՝ բացառությամբ ԺԲ. դարից պահպանված մի թերթի եւ «Ավետում/Ծնունդ» տեսարանների:

Ավելին, Ս. Տեր-Ներսիսյանը ներկայացնում է նաեւ Հ^մ 555-ի 1653 թ. հիշատակարանը, որտեղ նշվում է, որ Սիմոն երեցը ձեռագիրը նորոգել է «բարեմիտ ու աստվածասեր» Հերիքնազի համար, այս նույն հիշատակարանը, ինչպես նաեւ վերոնշյալ հիշատակարանը Մաքսուդյանը ժամանակին օրինակել է 1358 թ. ձեռագրից:

Այսպիսով՝ ամփոփելով վերոնշյալը եւ հաշվի առնելով այն հանգամանքը, որ Հ^մ 555-ում տերունական շարքը ներկայացված չէ սկզբի թերթերի վրա, ինչպես ընդունված էր Վասպուրականում, այլ ցրված է ձեռագրով մեկ, մեջբերենք Լեյոյանի կարեւոր եզրահանգումը, այն է՝ Դուրլինի Չեսթեր Բիթի հավաքածուի Հ^մ 555 ձեռագիրը Զաքարիա Աղթամարցու կորած համարվող 1358 թ. ծաղկած Ավետարանն է²⁰: Պատկերն ավելի ամբողջական է դառնում, երբ Մոն-Սեն Միշելի ձեռագրերի թանգարանի «Ավետում/Ծնունդ» տեսարանները պատկերող պատառիկին հավելում ենք նաեւ Զագրեթի Միմարա թանգարանում պահվող երկու թերթը՝ Օհան կազմողի կողմից գրված 1593 թ. հիշատակարանը, Եւսեբիոսի նամակը եւ կանոնների երկու աղյուսակը:

Պարզվում է, որ գործ ունենք գրեթե ամբողջական մի ձեռագրի հետ, որը երկար ժամանակ դասվում էր Աղթամարցու՝ կորած համարվող ձեռագրերի շարքին: Զեռագրից դեռեւս պակասում է մի քանի թերթ, այդ թվում նաեւ 1789 թ. հիշատակարանը, որտեղ նշվում է, որ ուստա Ավագը այս Ավետարանը գնել է անհավատների ձեռքից:

Լիահույս ենք, սակայն, որ գուցե մի օր ի հայտ գան ոչ միայն այդ, այլեւ Զաքարիա Աղթամարցու՝ կորած համարվող եւ գուցե մեզ դեռեւս անհայտ ձեռագրեր:

Մաքսուդյանի գրի առած հիշատակարանների ուսումնասիրության արդյունքում պարզ դարձավ, որ Զաքարիա Աղթամարցու կորած համարվող 1389

թյուններ է տեսում Խիզանի 1335 թ., Արծկեի 1338 թ., ինչպես նաեւ Չեստեր Բիթիի Հ^մ 565 ձեռագրերի հետ):

19 Տե՛ս անդ, էջ 15:

20 Տե՛ս A. Leyloyan-Yekmalyan, Fragment, էջ 259:

թ. ճառընտիրը եւս պահվել է Ագուլիսի Ս. Թովմա առաքյալի վանքում 24 համարի տակ²¹: Ձեռագրի՝ մեզ հասած հիշատակարանում Կարապետ գրիչը գրում է, որ Ավետարանի վրա աշխատել է «ի յայսպիսի դառն եւ աղետակոծ ժամանակիս, ես՝ նուսաստ ի գրչաւորաց Կարապետ քահանայ, սկսայ զգիրքս այս...», ինչպես նաեւ խնդրում է հիշել «զԶաքարիայ, որ գրելոյն աւգնեաց եւ ծաղկեաց»²²: Ձեռագրի ստացողը Ստեփանոսն է, ով այն որպէս ընծա հանձնել է Գավաշ գյուղի Ս. Ամենափրկիչ եւ Ս. Տիրամայր եկեղեցիներին: Այս ձեռագրի մասին մեր տեղեկությունները եւս հասնում են ընդհուպ 1919 թ.-ը, սակայն հույս ունենք, որ 1358 թ. ձեռագրի օրինակով այն եւս մի օր կհայտնաբերվի աշխարհի որեւէ թանգարանում կամ մասնավոր հավաքածուներից մեկում:

* * *

Ագուլիսն իր աշխարհագրական դիրքի շնորհիվ մշտապես գտնվել է քաղաքական եւ մշակութային իրադարձությունների կենտրոնում: Հայտնի Գողթն գավառի այս քաղաքը տարածված է եղել այժմյան Վերին եւ Ներքին Ագուլիսներ գյուղերի տարածքում, իսկ պատմական տարածքը գտնվում է Օրդուբադ շրջկենտրոնից 2-2,5 կմ հեռավորության վրա²³:

Սուրբ Թովմայի վանքը, որն իր պատմական անցյալով կենտրոնական տեղ է զբաղեցրել Ագուլիսի մշակութային կյանքում, կառուցվել է 325 թ., Բարդուղիմեոս առաքյալի կողմից, հետագայում մի քանի անգամ վերանորոգվել է²⁴:

Զաքարիա Աղթամարցու՝ Վասպուրականում ծավալած գործունեության արդյունքում այսօր մեզ են հասել մի շարք ձեռագրեր, որոնցից յուրաքանչյուրը ինքնատիպ է: Ձեռագրերի ոճական եւ պատկերագրական ընդհանրությունները, երբեմն նաեւ կրկնությունները, ավելի են ընդգծում Աղթամարցու ինքնատիպությունը, նրա սեփական ձեռագիրը, որով առանձնանում էր իր ժամանակակիցների շրջանում:

Նրա ֆիգուրները կենդանի են, վառ, գույները՝ պարզ, բայց միեւնոյն ժամանակ արտահայտիչ: Աղթամարցու գրչի տակ գիծը կարծես շունչ է առնում եւ ներդաշնակ գույների մաքուր գործածությամբ ոճավորվում՝ կենդանություն հաղորդելով կերպարներին: Չնայած պատկերների հարթությանը՝ դրանք օժտված են ճկուն խաղով, տարածության մեջ ազատ են, զգայուն եւ

21 Տե՛ս Մ. վ. Մաքսուտեան, նշվ. աշխ., էջ 759-766:

22 «ԺՂ. դարերի հայերեն ձեռագրերի հիշատակարաններ». կազմեց Լ. Մ. Խաչիկյան, Երեւան, 1950, էջ 579:

23 Ա. Այվազյան, Նախիջևանի պատմաճարտարապետական հուշարձանները, Երեւան, 1978, էջ 8:

24 Տե՛ս անդ., էջ 11:

արտահայտիչ՝ շնորհիվ գումավոր գծային, հաճախ շագանակագույն, իսկ աչքերի դեպքում՝ կապտականաչավուն ուրվագծի կիրառման:

Կարող ենք ասել, որ Վասպուրականի մանրանկարչական դպրոցի ինքնատիպ ոճը պայմանավորված է նաեւ Աղթամարցու նախասիրություններով. նրա լակոնական, անխառն, բայց վառ եւ ինչ-որ չափով կոնտրաստային գունաշարը, հարթային եւ կյանքով լեցուն պատկերները, ավետարանական թեմաները աշխարհիկ շնչով մատուցելը, դրանց բնորոշ արտահայտչականությունը մի տեսակ ավանդույթի են վերածվում ոչ միայն վասպուրականյան, այլեւ ամբողջ հայկական մանրանկարչական արվեստում:

Սկրտիչ քահանայի եւ Թանկիաթունի որդի Զաքարիա Աղթամարցին սերում էր նկարչական եւ գրչական ծիրքով օժտված ընտանիքից: Նրա եղբայր Կարապետը եւս զբաղվում էր գրչությամբ: Բացի այդ՝ նա Դանիել եւ Թումա գրիչների հորեղբայրն էր եւ նրանց ուսուցիչը, ինչի մասին վկայում են վերջիններիս թողած հիշատակարանները՝ 1404, 1409, 1412, 1421, 1433 եւ 1441 թվականների ձեռագրերում, ինչպես նաեւ 1403 թ. (Հ^մ 4923) ձեռագրում, որի ծաղկողը Զաքարիա Աղթամարցին է. «Արդ, գրեցաւ սուրբ Աւետարանս յաստուածաբնակ կղզիս Աղթամարի... ի հայրապետութեան տէր Դանիի, ի թուականիս հայոց ՊԾԲ. ... Յիշեցէք... դարձեալ զվարդապետն իմ եւ զհոգեւոր հայրն եւ ըստ մարմնոյ հաւրեղբայրն զԶաքարայ փիլիսոփայն, որ բազում աշխատեցաւ ի ծաղկել գտուրբ Աւետարան»²⁵:

Ուշագրավ է, սակայն, Թումայի գրչագրած 1426 թ. (Վրացական թանգարանի Հ^մ 23) Ավետարանի հիշատակարանը, որտեղ Զաքարիան հիշատակվում է որպես «գհանգուցեալն ի Զրիստոս»²⁶:

Այս ուսումնասիրության մեջ ընդգրկել ենք Զաքարիա Աղթամարցու անունով հայտնի ձեռագրերի 18 միավոր²⁷, քանակին ավելացնում ենք եւս երեք ձեռագիր, որոնք, ցավոք, մեզ հայտնի են միայն հիշատակարաններով:

25 Ա. Երեմյան, Գրիչ Դանիել քահանա, Մանրանկարիչ եւ գրիչ Զաքարիա Աղթամարցի-Հայաստանյայց եկեղեցի, Նիւ Եորք, 1965, թ. 2, էջ 47:

26 «ԺԵ. դարի հայերեն ձեռագրերի հիշատակարաններ», Մասն առաջին (1401-1450 թթ.), Կազմեց Լ. Ս. Խաչիկյան, Երեւան, 1955, էջ 357:

27 Հ. Հակոբյանը «Վասպուրականի մանրանկարչությունը» (Երեւան, 1976, էջ 199) եւ «Մանրանկարիչ Զաքարիա Աղթամարցի».- («Պատմաբանասիրական հանդես», 1966, թ. 2) հոդվածում խոսում է Զաքարիա Աղթամարցուն պատկանող 18 ձեռագրերի մասին, սակայն ձեռագրերի ցանկ չի տալիս, իսկ Աստղիկ Գեորգյանն իր «Հայ մանրանկարիչներ» (Մատենագիտություն, 9-19-րդ դդ., Գահիրե, 1998) գրքում Զաքարիա Աղթամարցու անվան հետ է կապում 16 ձեռագիր, որոնցից երկուսը Հ^մ 10829 եւ Հ^մ 5510-ը Հակոբյանի ներկայացրած ձեռագրերի շարքում չկան: Աննա Լեյլոյան-Եկմալյանը եւս ներկայացրել է Զաքարիա Աղթամարցու գրչին պատկանող 18 ձեռագիր, որոնց շարքում խոսում է նաեւ 1304 թ. գրված եւ 1374 թ. Զաքարիայի կողմից ծաղկված Ավետարանի մասին, որից, ցավոք, մեզ միայն հասել է հիշատակարանը (Ե. Լալայեան, Յուզակ հայերեն ձեռագրաց Վասպուրականի, 1915, Պրակ Ա., Թիֆլիս, էջ 142-143): Իսկ Հ^մ 555-ը (Չեստեր Բիթի հավաքածու, Դուբլին), ինչպես պարզվեց, հենց 1358 թ. Ավետարանն է:

Միայն հիշատակարանի տեսքով հայտնի ձեռագրերից մեկը ԺԴ-ԺԵ. դարերով թվագրվող մի Ավետարան է, որը պահվել է Կարինի Արծնյան վարժարանի թանգարանում²⁸: Ձեռագրի երեք հիշատակարանից մեկում նշվում է գրչի՝ Զաքարիա Աղթամարցու անունը. «Զմեղուցեալ գրողս զսուտանուն կրօնաւոր Զաքարայ եւ ստացողն յիշեցէ՛ք ի Քրիստոս, աղաչեմ», ինչպես նաեւ տեղեկանում ենք, որ ձեռագիրն ստեղծվել է Աղթամարում, Յակովբ եպիսկոպոսի համար: Նոտրդիր մի այլ հիշատակարան արդեն վերաբերում է ձեռագրի՝ Ռ.Լ. (1585) թ. նորոգմանը:

Երվանդ Լալայանի շնորհիվ մեզ է հասել Զաքարիայի մասնակցությամբ ստեղծված եւս երկու ձեռագրի հիշատակարան, որոնցից մեկը Լալայանի ցուցակում զբաղեցնում է 107 համարը²⁹: 1392 թ. Աղթամարում ստեղծված ձեռագրի գրիչը Կարապետ քահանան է: Ձեռագրի նկարագրության մեջ նշվում է, որ ծաղկողը եւ կազմողն անհայտ են, սակայն, կարդալով գրիչի հիշատակարանը, պարզ է դառնում, որ ձեռագրի ծաղկողը Զաքարիան է. «զԶաքարիայ կրաւնաւորն, որ աշխատեցաւ եւ ծաղկեաց»³⁰:

Լալայանի ցուցակի Հ^մ 77 ձեռագրի գրիչը եւս Զաքարիան է³¹: Ձեռագիրը գրվել է 1304 թ., իսկ 1374 թ. նորոգվել է: Հիշատակարաններում նշվում են նաեւ 1304 թ. (Թումա եւ Հայրապետ) եւ 1374 թ. (Վարդան եւ Ոսկի) ստացողների անունները, ինչպես նաեւ Սարգիս կազմողի անունը: Հիշատակարանում կարդում ենք նաեւ Կարապետ ստացողի անունը, ով ձեռագիրը հանձնել է Ս. Ստեփանոս Նախավկայի վանքին:

28 **Յ. Ծ. Վ. Բուենս**, Ցուցակ հայերեն ձեռագրաց Արծնեան վարժարանի ի Կարին, «Հանդես ամսօրեայ», 1961-1962, էջ 102: Որպես Զաքարիա Աղթամարցու աշխատանք՝ այս ձեռագիրը նշում է նաեւ Լ. Թումանյանը «Աղթամարի պատմամշակութային ժառանգությունը» գրքում («Հեղինակ-կազմող՝ Կ. Մաթևոսյան, մասնակից հեղինակներ՝ Լ. Թումանյան, Ա. Ասրյան, Սբ. Էջմիածին, 2013, էջ 164):

29 **Երուանդ Լալայան**, նշվ. աշխ., էջ 225-226: Այս ձեռագիրը նշում է նաեւ Լ. Թումանյանը «Աղթամարի պատմամշակութային ժառանգությունը» գրքում (էջ 165):

30 Տե՛ս անդ., էջ 227-228, Այս ձեռագրի մասին հիշատակում է նաեւ Հրաչյա Աճառյանը՝ «Հայոց անձնանունների բառարան», հ. Բ., Երեւան, 1994, էջ 189: Այս նույն էջում Զաքարիա Աղթամարցու Խաչիկ անունով եղբոր կապակցությամբ Աճառյանը նշում է. «Կարծեմ թե նույն Խաչիկն է, որ 1402թ. սարկավագ է ձեռնադրվել եւ կոչվել Ներսես», սրանից պարզ է դառնում, որ Աճառյանը Զաքարիա Աղթամարցուն շփոթել է Հովհաննես Խիզանցու եղբայր գրիչ Զաքարիայի հետ, որի մյուս եղբոր անունը Ներսես էր, իսկ հոր անունը՝ Մկրտիչ քահանա: Հովհաննես Խիզանցու եղբայր Զաքարիա գրիչը Աղթամարցու ժամանակակիցն էր, նրանից մեզ հայտնի է երեք ձեռագիր, որոնցից երկուսը՝ Հ^մ 4223-ը (1401 թ., Խիզան, ստացող՝ Աստվածատուր քահանա, 14 տերունական պատկեր, Ցուցակ ձեռագրաց Մաշտոցի անվան Մատենադարանի, հատոր Բ., կազմեցին Օ. Եգանյան, Ա. Զեյթունյան, Փ. Անթարյան, Երեւան, 1970, էջ 1174) եւ Հ^մ 3202-ը (1417 թ. Բաղգիրք, ստացող՝ Ավետիս վարդապետ, ԺԵ. դ-ի հիշ-ք, Ա., էջ 197-198) պահվում են Մատենադարանում, իսկ 1413թ. Ավետարանը հայտնի է միայն հիշատակարանի տեսքով (Կյումուշխանյայի Ս. Փրկչի վանքի Հ^մ 2 ձեռագիր, Վան, ստացող՝ Ղուկաս քահանա, Տեր Հովհաննես ա. քահանա Մկրյան, Կիւմիշխանէի Ս. Փրկչի վանուց ձեռագիր մատենաթ եւ յիշատակարանը, Արարատ, 1905, էջ 728-730):

31 Տե՛ս անդ., էջ 143-144. այս ձեռագիրն իր կազմած ցանկում նշում է նաեւ Աննա Լեյլոյան-Եկմալյանը՝ A. Leyloyan-Yekmalyan, Fragment , էջ 241-264:

Ամփոփելով, ներկայացնենք Զաքարիա Աղթամարցու՝ այս պահին մեզ հայտնի 21 ձեռագիր մատյանների ամփոփ ցանկը, որը գուցե հիմք դառնա այս տաղանդավոր վասպուրականցու վաստակը հետազայում ավելի ամբողջական ներկայացնելու համար, հատկապես եթե հաշվի առնենք, որ բացառված չէ, որ աշխարհի ցանկացած անկյունում կարող է հանգրվանած լինել Զաքարիա Աղթամարցու գրչագրած կամ ծաղկած ձեռագրի թեկուզ մեկ թերթ:

* * *

Ցանկ Զաքարիա Աղթամարցու ծաղկած եւ գրչագրած ձեռագրերի

	Հավաքածու	Բվնդկ.	Ժամանակ	Ստեղծման վայր	Գրիչ	Ծաղկող
1	Մատ. Հ ^մ 2843	Ավետարան	1354	Աղթամար	Կարապետ կր.	Զաքարիա Աղթամարցի
2	Մատ. Հ ^մ 4915	Ավետարան	1355	Աղթամար	Գրիգոր	Զաքարիա Աղթամարցի եւ Թումա քահանա
3	Մատ. Հ ^մ 5332	Ավետարան	1357	Ս. Գեորգ վանք	Կարապետ կրոնավոր	Զաքարիա Աղթամարցի
4	Մաքսուդյան, էջ 562-563	Ավետարան	1358	Աղթամար	Կարապետ կրոնավոր	Զաքարիա Աղթամարցի
	Չեսթեր Բիթիի Հ ^մ 555		ԺԲ. դ. 1358	Աղթամար	Հակոբ Կարապետ կրոնավոր	Զաքարիա Աղթամարցի
	Ավրանշի Հ ^մ 7		1358	Աղթամար		
5	Մատ. Հ ^մ 10829	Ավետարան	1365-1366	Խիզան	Ստեփանոս	Զաքարիա Աղթամարցի
6	Մատ. Հ ^մ 5347	Ավետարան	1368	Խիզան	Ստեփանոս	Զաքարիա Աղթամարցի
7	Մատ. Հ ^մ 4687	Ճաշոց	1312 1371	Աղթամար	Դանիել	Դանիել (?) Զաքարիա Աղթամարցի
8	Մատ. Հ ^մ 6422	Ավետարան	ԺԲ. դ. 1371	Աղթամար	Թումա քահանա	Զաքարիա Աղթամարցի
9	Լալայան, 1915, էջ 143-144	Ավետարան	1304 1374	(?)	(?)	- Զաքարիա Աղթամարցի
10	Մատ. Հ ^մ 6402	Ավետարան	1377	Աղթամար	Ավագ դպիր	Զաքարիա Աղթամարցի
11	Մատ. Հ ^մ 4870	Ճաշոց	1385	Աղթամար	Զաքարիա Աղթամարցի	Զաքարիա Աղթամարցի
12	Մատ. Հ ^մ 5480	Ավետարան	1387-1388	Մանուկ Ս. Նշան, Աղթամար	Պետրոս, Ատոմ(ցանկերի գրիչը)	Զաքարիա Աղթամարցի (?)

13	Խաչիկյան, 1950, էջ 577-578	Ճառքնտիր	1389	Աղթամար	Զաքարիա Աղթամարցի եւ Կարապետ քահանա	Զաքարիա Աղթամարցի
14	Մատ. Հ ^փ 4941	Ավետարան	1390	Աղթամար	Զաքարիա Աղթամարցի	Զաքարիա Աղթամարցի
15	Մատ. Հ ^փ 4908	Ավետարան	1393	Աղթամար	Զաքարիա Աղթամարցի	Զաքարիա Աղթամարցի
16	Մատ. Հ ^փ 5510	Ավետարան	1399	Աղթամար	Զաքարիա Աղթամարցի եւ Դանիել սարկավազ (ցանկերի գրիչը)	Զաքարիա Աղթամարցի եւ Թումա քահանա
17	Մատ. Հ ^փ 4923	Ավետարան	1403	Աղթամար	Կարապետ քահանա եւ Դանիել	Զաքարիա Աղթամարցի
18	Մատ. Հ ^փ 10522	Ավետարան	ԺԴ. դ.	Աղթամար(?)	Զաքարիա Աղթամարցի (?)	Զաքարիա Աղթամարցի
19	Քոսյան, էջ 102	Ավետարան	ԺԴ.-ԺԵ. դդ.(?)	Աղթամար	Զաքարիա Աղթամարցի	(?)
20	Լալայան, էջ 225-226	Ավետարան	1392	Աղթամար	Կարապետ քահանա	Զաքարիա Աղթամարցի
21	Մատ. Հ ^փ 4740	Ավետարան	ԺԴ. դ դար	(?)	(?)	Զաքարիա Աղթամարցի

РЕЗЮМЕ

В результате деятельности Закария Ахтамарского в Васпуракане до нас дошли ряд рукописей, стилистические и иконографические сходства которых еще больше подчеркивают оригинальность автора, как и его почерк, который выделялся среди своих современников.

В статье мы представляем 2 листа (Музей Мимара, Загреб) рукописи 1358 года Ахтамарского, которые считались утерянными. В одном листе сохранилась памятная запись (болоргир), на обратной стороне которой представлено письмо Евсевия Кесария Карпиану.

Листы 3а и 3б рукописи 1358 года являются хоранами, которые почти с точностью повторяют стилистику рукописи 1357 года. Картина этой рукописи становится более полной, когда к ней добавляем еще один лист, отображающий «Благовещение / Рождество» из музея Мон-Сен-Мишель. Исходя из этого можно сделать вывод, что рукопись номер 555 из собрания Честер Битти является рукописью 1358 года Закария Ахтамарского. В результате у нас полноценная рукопись, которая долгое время считалась утерянным.

В этой статье к 18 рукописям, автором которых считается Закария Ахтамарский прибавляем еще три, которые, к сожалению, до нас дошли только в виде памятных записей.

SUMMARY

A number of manuscripts by Zakaria Aghtamartsi painted during his activities in Vaspurakan, peculiar with their stylistic and iconographic features highlight the originality of the scribe thus making him stand out among his contemporaries.

In this article we represent two sheets of manuscripts dating back 1358 which were considered lost eventually kept in Zagrebi Mimara Museum. A kolophon of the manuscript has been preserved in one of the newspapers the reverse page depicting the letter written by Eusebios of Cesarene to Carpianos . The 3a and 3b pages of the manuscript painted in 1358 represnt alters which are almost copies of the one dating a year back. We witness a more complete form of the manuscript by adding one more sheet, depicting “Annunciation / Christmas” scenes, kept in Mount Saint Michel manuscript museum.

All these make us to conclude Number 555 manuscript of Dublin Chester Beatie collection is but Gospel of Zakaria Aghtamartsi painted in 1358. As a result, we are dealing with a nearly complete manuscript, which has been long considered to the series of painter’s lost manuscripts.

This article deals with another three manuscripts in addition to well known 18 ones. Unfortunately we are familiar with the three manuscripts only through the kolophons.